

Ilanngussaq 3 Tele Greenland A/S-ip 2010-mi ataatsimeersuartitsinera – Aktiaatillit oqalugiaataat

”Aallarniutigalugu Naalakkersuisut sinnerlugit ukiumi qaangiuttumi sulilluarsimanersi pillugu qujarusuppunga. Kalaallit Nunaanni nuna tamakkerlugu attaveqaatit ingerlaavartinneqarnerini suliassat pingaarutillit isumagisaraasi, aammalu suliassat sulisunit tunniusimasunit pikkorissunillu, ulluinnarni annertuumik suliaqartartunit isumagineqartut isigalugu nuannerpoq.

TELE-p nunami sumiiffinni pissutsit ajornakusoortut innuttaasullu akulikissusiat apeqqutaatinnagit sullissinermik tunisassiaminillu tamanik nutarterinissaq eqqumaffigilluarmagu Naalakkersuisut nuannaarutigaat. Kisiannili ilaatigut aamma aningaasatigut nalorninartorsiorneq suli ingerlasoq eqqarsaatigalugu siunissami aningaasartuutit eqqumaffigisussaavagut, aammalu piffissami qaninnerusumi aningaasaliissutit iminnut akilersinnaassusiat misissuiffigisussaavarput, aningaasaliinermilu aningaasartuutit atuisut aningaasaliissutinik iluaquteqartut amerlassusaannut ataqatigiissittussaallugit.

Sullissiviit ingerlatseqatigiiffiillu pigisatta ineriartornermut malinnaanissaat, aammalu nunarsuarmi attaveqaqatigiinnerup iluani paasissutissanillu nassitsisarnermik atuilernissamat, taakkulu ataanni Imapik ikaarlugu pisinnaasat sinnerinik tunisinissamat periarfissanik atorluanaanissamat piareersarnissaq pingaaruteqarpoq.

Innuttaasut suliffeqarfiillu ataasiakkaat soorunami attaveqaqatigiinnermik akikitsumik pitsaasumillu atuinissamik kissaateqarput. Taamaattumik ingerlatseqatigiiffiup taarsigassarsivigisaminut pisussaaffini eqqarsaatigalugit inuiaqatigiinnut iluaqutaanerpaamik qulakkeerinissani ilisimaarissagaa Naalakkersuisut naatsorsuutigaat.

Suliffeqarfiit innuttaasullu internetimik atuinissamat kaammattorneqassapput, aammalu internetip atornissaa ajornartinnagu atuinissamat kajumissaarneqassallutik, tamanna inuiaqatigiit aningaasaqarnerat avatangiisillu eqqarsaatigalugit aaqqiissutissatut pitsaanerpaammat. Aammaloorlugu:

Immap naqqatigut kabeliineq eqqarsaatigalugu TELE aningaasaliinikkut isumatusaartumik iluatsilluartumillu suliaqarsimammat nuannaarnartorujussuuvoq. Immap naqqatigut kabeli attaveqaateqarnermi tunngaviliineruvoq, nalunaarasuartaatinik atuinerup saniatigut aamma nunatsinni inuiaqatigiit uummaarissumik ineriartornissaannut nutaamut kaammattuutaasusaaq. Tassani arlalinnik sammivilinnik eqqarsartoqarpoq. Immap naqqatigut kabeli sullissivinni arlalinni (IT-mut, siunnersuineranut, niuerneranut il.il. tunngatillugu) nutaanut aningaasaliinissamat, ineriartortitsinissamat suliallu amerlinissaannut kaammattuutaasariaqarpoq. Taamatuttaaq immap naqqatigut kabeli Kalaallit Nunaanni ilinniarfiit nunarsuullu sinnerata akornanni suleqatigeeriaatsinut nutaanut kaammattuutaasariaqarpoq. Inuusuttut ilinniartitaanikkut periarfissaannut taamaalillunilu inuiaqatigiinnut iluaqutaasumik.

Allakkerineq suli ilaatigut teknologiimik ineriartortitsineq, e-mailinik aamma homebankingini atuinissamat periarfissiisoq pissutigalugu allakkat nassiunneqartartut ikiliartornerannit artorsartinneqarpoq. Naak POST Greenland aammaloorluni naatsorsuutit inernerinik naammaginartunik takutitsigaluartoq. Ajornartorsiuutit immikkut ittut, POST Greenlandimut tunngassuteqartut Naalakkersuisut eqqumaffigaat, aammalu POST Greenlandip suli unammilligassani pitsaanerpaamik naammassisinnaammagit nuannaarutigaat.

Inuiaqatigiinni tamani piginnaangorsaaniarluni suliat suli pingaartinneqarnerat Naalakkersuisut pingaarutilittut isumaqarfigaat. Tamanna pissutigalugu TELE Greenlandip ilinniartitaanermik piginnaangorsaanermillu anguniagaqarnera Naalakkersuisut iluarisimaarpaat. Ilinniartitaaneq ilisimasanillu annertusaaneq nalinginnaasumik suliffeqarfimmut pingaartumillu sulisunut ataasiakkaanut pitsaaqutaavoq. Siunissami aqutisussat kalaallit ilinniartitaanerat inuiaqatigiinnut taamatullu suliffeqarfimmut annertuumik iluaqutaasussaavoq, aammalu anguniakkat taakku ingerlaavartumik ingerlanneqarnissaat Naalakkersuisut kissaatigaat.

Nunat issittut avatangiisaat sunnertiasorujussuupput. Tamanna pissutigalugu TELE Greenlandip sapinngisamik avatangiisinut sunniteqanngitsumik atortussanik ilusilersuisarnerminik kiisalu suleriaatsinik piareersaasarnerminik ingerlatsiinnarnissaa Naalakkersuisut pingaartippaat.

Kalaallit Nunaat ullumikkut nunarsuarmut nutaaliaasumut ilaavoq, aammalu Kalaallit Nunaata nunat tamat eqqarsaatigalugit inissisimaneramik nukittorsaaniarluni suliniutit aallartinneqartarput periusissanillu suliaqartoqartarluni. Taamaattumik Naalakkersuisut nunap iluani paasissutissiisarnermut attaveqatigiittarnermullu teknologiimut suliniutissanik, IKT-nik taaneqartartunik aallartitsippat, tassanilu IKT-p iluani 2015-ip tungaanut ineriartornermut tamatumalu nukittorsarneqarnissaanut sinaakkusiisoqassaaq. IKT-mik suliniuteqarnermi pingaarutilit ilaattut kiffartuussineq, innuttaasunut, suliffeqarfimmut sullissivinnullu atorneqartoq annertuumik anguniagaqarfiusoq pilersaarusioneqassaaq, taamaalillunilu TELE-p politikkikkut anguniagassanik ersarissunik kissaateqarnera naammassineqassaaq, aammalu IKT innuttaasunut tamanut siaruarneqassalluni. IKT-mut suliniutip 2010-p naanerani naammassineqarnissaa naatsorsuutigineqarpoq.

Naggasiutigalugu periarfissaq manna iluatsillugu siulersuisut qullersaqarfillu ukiumi qaangiuttumi sulilluarsimanerannik qutsavigiumavakka. Kiisalu periarfissaq manna iluatsillugu qullersaqarfik qinnuigissavara, ingerlatseqatigiiffimmi sulisunut, ukiumi qaangiuttumi sulilluarsimanerannut qujassuterput annertoq apuuteqqullugu.

Taamatut oqaaseqarluta Naalakkersuisuniit siulersuisut nalunaarutaat tusaatissatut tiguarput.”